

歷代崇道記

惟一

穆王於崑崙山王屋山嵩山華山泰山衡山恒山終南山會稽山青城山天台山羅浮山崆峒山致王母觀前後度道士五千餘人秦始皇帝併吞六國招方士好長生之術遣使往蓬萊採不死藥造宮觀一百餘所度道士一千七百餘人漢文帝實太后並好黃老之術造宮觀七十二所勅天下如不通黃老經者不得往官又親訪河上公問道德之要天下大治計度道士一千餘人孝武帝奉道彌篤感王母降於宮中遺帝白銀像五軀曰是太上老君之真形也帝別營三殿而供養之後移像於柏梁臺上後又移於甘泉宮內以一殿而並列之南向設座自茲始也又度公主數人及度道士約五千餘人并造觀三百餘所其嵩嶽萬歲觀泰山登封觀華山集仙觀終南望靈觀王屋通天觀並不得令庶姓居之以為恒式其萬歲觀因帝巡幸而關山呼遂捨行宮而為觀焉至孝宣帝時有上黨郡功曹李惲因入抱犢山採藥於石室內獲

天書四十餘卷并玉箱玉杖獻於河東郡太守張純純立遣使上進帝視之大驚不覺流涕乃令宣示內外臣僚時毋妄為主書中郎將見之泣曰此是武帝臨崩時遺制今葬於梓宮之內何由至此及披之卷後所有臣僚校勘姓名于今見有存者帝乃遣使檢校茂陵即又安先如故帝乃為武帝造觀二所一在長安城內一在茂陵之下以奉先帝也復度道士二十人以奉香火也後赤眉之亂茂陵為賊所發於梓宮之中但見有劍一口方欲取之其劍忽然哮吼騰空而去世祖光武皇帝既平王莽天下大定東封禮畢乃為本朝十一帝追薦及南陽春陵名山大川長安洛陽計造觀一百二十所度道士一千八百人魏明帝為武帝及先太后造觀於五都計一十三所度道士一百九人仍詔道書同御史裝飾吳主孫權於天台山造桐柏觀命葛玄居之於富春造崇福觀以奉親也建業造興國觀茅山造景陽觀都造觀三十九所度道士八百人晉武帝於洛陽造通天洞天靈

仙室寶四觀及諸州共二百所先魏末隴右臨洮郡有神人長三丈著白衣垂素髮戴金冠現於襄武縣告縣人王始曰不久當見太平及武帝受禪果天下一統帝乃令於所現處造告平觀即李宗之故居也別度道士七人并前後所度道士共計四百七十二人時吳郡臨平湖岸崩獲石鼓一枚遣使上進帝問司空張華此物何用曰但以桐木刻作鯨魚形扣之必有聲聞於數里至惠帝時於宮中忽夜鳴不已帝甚惡之乃遣嵩山萬歲觀擊之集衆自茲始也後魏道武帝於雲中太原及河朔造觀計五十所度道士六百餘人太武帝令天下造太平觀共二百七十五所度道士一千三百人帝受錄改太平真君元年仍令四方內外上書言太平真君皇帝陛下自後帝嗣位並皆受錄後周武帝於長安造通玄館以延羽客隋高祖文皇帝遷都於龍首原號大興城乃於都下畿內造觀三十六所名曰玄壇度道士二十人煬帝遷都洛陽復於城內及畿甸造觀二十四所度道士

一千一百人皇朝高祖神堯大聖大光孝皇帝於隋末大業十三年感霍山神稱奉太上老君命告唐公汝當來必得天下至武德元年晉州浮山縣羊角山著素衣戴金冠乘朱駿白馬令吉善行告神堯汝今得聖理可於長安城東致一安化宮而安道像則杜稷延長天下大定善行辭見天子何以爲據太上曰但去有獻石龜者可以爲信善行乃告晉州刺史賀君孝義遂將善行見秦王具言神人現事群官拜慶遂差左親衛帥杜昂與善行於所現處設祭太上又現一如善行所言以鞭指昂曰汝是何人昂曰是秦王使者太上曰我不飲不食何用祭乎所有妄曲令人具知昂還乃言神人復現秦王大悅乃令昂將善行入京上奏至京立未定果有邱州治中張達獻石龜上有文曰天下安子孫興千萬歲千萬葉遂入面奏高祖大悅詔授善行爲朝散大夫賜物一百段乃令通事舍人柳憲於羊角山立廟復改浮山縣爲神山縣羊角山爲龍角山太上又現爲善行曰天

子喜歡否對曰大喜又曰疑惑何事復對曰爲不知聖者姓名耳太上曰我是無上神仙姓李氏號老君即我也我即帝之祖也史記中有傳亳州谷陽縣本廟有枯樹再生爲驗我已今周公旦領神兵助國家打劉黑闥得四月節即破矣孝義又令善行入奏高祖乃勅善行馳驛往洛陽軍所宣勅示諭至時果平黑闥四海大定枯樹亦重生焉乃改廟爲慶唐觀今觀內有明皇御製書碑及列聖真容垂在武德三年詔晉陽道士王遠知授朝散大夫并賜縵金冠子紫絲霞被以預言高祖受命之徵也太宗又加遠知銀青光祿大夫垂遠知預言之故也羽衣人賜紫衣自茲始也高宗龍朔二年詔洛州長史熊國公許力士於邱山建上清宮以鎮鬼仙洞掘得古石按即仙人帛仲理之故基也及功畢帝令設醮太上又現百官進表稱賀帝大悅乾封初帝東封禮畢迴鑾亳州親謁太上謹上尊號爲混元皇帝聖母爲先天太后仍改谷陽縣爲真源縣又爲太宗文德皇后造東明

觀於京師又勅道士宜祿宗正寺仍立位在親王之次文明元帝天后欲王諸武太上乃現于魏州閔鄉縣龍臺鄉方輿里皇天原遣鄆玄崇今傳言於天后云國家祚未而享太平不宜有所借也天后遂寢乃捨閔鄉行宮爲奉仙觀後慶山湧出於新豐縣界高三百尺上有五色雲氣下有神池數頃中有白鶴鸞鳳四面復有麒麟獅子天后令置慶山縣其諸祥瑞具載天后實錄以表國家土德中興之兆也又捨中嶽奉天宮爲嵩陽觀以追薦高宗大帝也竟傳位於中宗孝和皇帝景龍元年勅天下州郡並令置景龍觀二年改爲中興觀三年改爲龍興觀其度人一依前代故事睿宗捨東京宅爲景雲觀又捨太原宅爲唐隆觀爲資薦天皇天后也明皇開元中勅諸道並令置開元觀又製混元讚帝親書勅之于石又勅五嶽置真君廟又勅上都置太清宮東都置太微宮以太原神堯舊宅爲紫微宮潞州潛龍故宅爲啓聖宮並給紫冕絳紗帷帳交龍門戟一如宮闕之制帝又

注道德經及製序引詔天下士庶並令家藏一本兩街道眾乃以幢幡伎樂自禁中迎引歸于太清宮香花之盛近古未有又勅置道舉一如禮部之制帝親自策之違者甚眾後清州秦因修紫極宮掘地獲玉石狀如半月復有仙人杵藥之像扣之有聲頗甚清遠帝令懸於太原玄元廟度號之為偃月磬東都留守張琦奏汝州魯山縣因修仙居古觀獲玉瑛扣之聲聞數里帝令懸於太清宮聖祖廟庭衢州為建觀宇穿地得魚一頭長三尺其狀似鐵微帶紫碧之色又如青石光瑩雕鑄殆非人工所成也扣之甚響其魚亦不能名遣使來獻帝令宣示百僚亦不能辨帝乃呼為瑞魚畧仍命懸於太微宮非講經設齋不得擊之由是諸觀競以木石模之以代集眾又詔諸官悉以宰臣及本道節度使領之未為常式帝又製雲篆羽本曲紫微八卦舞以薦獻於太清宮貴有異於九廟也帝東封復江淮間三春茅乃令於所獲之地置靈茅觀乃禮畢迴謁聖祖於亳州本宮觀禮道

德經於石作大幢造八角樓覆之於虛元殿之前又幸懷州開元觀及開鄉奉仙觀為王公萬民所請亦親札二經以大石對峙立之一如太清之製乃詔授鄆玄崇為魏州刺史開元十七年夏四月五日益州大都督府長史張敬忠奏大聖祖混元皇帝應現於富管蜀州新津縣津興尼寺佛殿柱上自然隱起木文為太上老君聖像當頂上有華蓋足下前後各有雲葉天花共一十三處謹差判官益州功曹參軍王大鐵檢覆得狀與本州刺史李忠拘別駕盧勝縣令李韶道士僧尼一百三十人狀同方敢上奏至五月二十四日勅差內侍林昭隱宣取像柱入京於大同殿供養又令兩街官觀各賜供養七日却令進入大內于今見在前後瑞應極多難以具錄

二十九年正月七日陳王府參軍田同秀於丹鳳門外忽見紫雲自西北映換又見混元乘白馬侍從二童子二童子謂同秀曰我昔與尹喜將入流沙之日藏一區靈符在桃林故關尹喜舊宅汝可請帝取之同秀具事聞奏勅差內使李志忠監同秀往陝州桃林縣南十二里故函谷關墟求訪之俄有紫雲白兔現於枯桑之下使乃穿掘下至水際得石函金匱玉板朱書細篆帝聞奏大悅即令京師列十部樂歌舞鼓吹自通化門入其文於寶輿中五色放光洞照天地帝於丹鳳樓上身披龍袞手執金鑑六宮嬪媵競於樓上焚香散花遙自作禮帝又令亂撒金錢於樓下縱令士庶分取以為歡樂斯須山呼之聲震動京邑帝令置寶符於靈昌殿是夜樓閣林樹之上皆有神燈乃於正月一日改開元三十年為天寶元年改桃林縣為靈寶縣其後三年帝見靈符有天寶千載之字天寶已應改元之號遂改年為載乃於其地長樂亭置天寶觀御製并書靈符銘立於所獲之處又於大內置靈符殿賜同秀五品正員官宰相請加尊號為開元天寶神武之字制可之乃大赦天下其年閏四月帝夢混元謂帝曰我在城之西南久矣當與汝於興慶相見可速迎我帝謂宰相李林甫牛仙客曰朕臨御海

內向三十年未嘗不五更而起具朝服禮謁其容為蒼生祈福近因假寐見混元具言上事逆差內使與道門威儀蕭玄裕於城西南尋訪數日忽於樓觀山谷間見有紫雲現白光屬天於其下穿之果得玉像老君高三尺餘以進其日帝在興慶宮大同殿親自迎謁果符興慶之言置於內殿供養仍令所司寫具容分送天下諸道宮觀遂大赦天下五載帝夢見混元言我有靈應事當自至遂於太白山獲靈符玉冊及迎到京置于靈符殿親自供養仍封太白山神為靈應公改獲符洞為嘉祥洞於山下置真符縣乃令諸道置真符觀仍編入史其年十二月帝幸華清宮其月四日日未出時忽見驪山頂雲物猶異須臾雲散見混元聖祖現於朝元閣上帝與內人瞻謁良久乃隱詔改會昌縣為昭應縣其新豐縣隸入昭應又封會昌山為昭應山封山神為玄德公改朝元閣為降聖閣內出圖本頒示天下宣付史官八載帝獲二十七仙玉像於寧州羅川縣勅令迎像入京一如天

寶初迎靈寶符儀注故事帝親自製譜尋改羅川縣為真寧縣於所獲處造通聖觀帝製碑文立之于今並在其年六月大同殿產五芝一莖又造金仙玉芝二觀復度公主二人為道士又太白山人李渾上言見混元言金星洞內有玉版石記聖皇福壽之符勅御史中丞王鉷入遊谷行四百餘里求而得之勅以殊祥頒示中外乃於其地造靈符觀閏六月丙寅帝謁太清宮加五聖尊號作仲尼四子像侍立於混元之前又勅十道大郡置玉芝觀大赦天下九載太白山人王玄翼上言混元大帝降現言寶仙洞中有妙寶真符謂帝取之勅刑部尚書張均工部尚書王倕往取獲之乃造真靈觀十三載正月帝謁太清宮又上混元尊號為大聖祖高上大道金闕混元天皇大帝五聖各加謚號帝加開元天地大寶聖文神武證道孝德皇帝大赦天下十五載帝幸蜀混元現於漢中郡三泉縣黑水之側帝親禮謁遂命刻石像真容於所現之處又於利州益昌縣山嶺上見混元騎白

衛而過示收林山之兆詔封其山為白衛嶺於所現之處置自然觀又於嵩山置興唐觀成都置福唐觀肅宗至德二載三月十八日混元現於通化郡雲龍巖初因郡人為國祈福建大齋會十八日忽煙霧異香氤氳不散至辰時漸漸開霽神光照天因見混元真像立於山前自地接天通身白衣左手垂右手執五明之扇儀相炳然衆瞻禮其山雖高亦不及肘良久乃隱遂具上奏內出圖本太上皇製讚并序文繁不錄具編史冊仍示天下乾元二年帝夜夢二青童導從至一宮闕謁見混元混元衣雲霞之衣冠九鳳之冠坐方席垂寶蓋凭玉几執白拂左右侍衛真人玉女神仙童子五天力士羅列極衆帝著絳衣乘圭立侍於混元之後遊涉山海經歷甚遠帝一一潛記又見混元鬚髮皆黑及明宣下兩街訪諸瑞像於務本坊光天觀聖祖院果獲黑髭老君之像圖寫以進帝見大悅一如夢中所想乃出帝真容令侍立於混元之後仍頒示於天下普令供養代宗初於楚

州安宜縣獲八寶因改安宜縣為寶應縣勃於所獲處造寶應觀遂改元為寶應元年大赦天下德宗貞元十年混元階使金母累降於果州金泉山授鍊炁之術付女真謝自然修習功成以其年十月十六日白日上昇後

三月乃歸謂刺史李堅曰天上有玉堂最高老君居焉壁上皆題神仙之名時注脚下云在人間或為帝王或為掌輔神仙入謁老君皆四拜焉自然言訖遂却昇天敬宗寶曆二年正月帝有事于南郊朝獻太清宮御駕將至長安縣主簿鄭翦忽見老君衣白衣容狀異常謂翦曰當此路有并可速寶之不然而在不測翦驚惶顧其地已微陷遂併力寶之因失老君所在駕至具以上聞百官稱賀詔兵部侍郎韋處厚為碑起居郎柳公權書立于寶井之側乃編付史官其年十二月十八日柳公權書碑之際忽有勁風颯然而起旋風不已乃見混元者紫衣金冠金履立於白蓮花之上右手執五明扇左手垂下空中光明如金色公權與鑄碑人瞻覩良久因以物

畫地記形像及畫畢混元忽以為指空中流光四散乃騰空而去眾皆側身仰視漸遠漸小沒於雲中遂以事上聞詔編事跡入碑之中又勃於兩京造延唐觀文宗開成二年五月中書舍人高元裕為閬州刺史於州北八

九里嘉陵江上小山之前忽見崖壁間光彩有異近而觀之石上自然石文成老君真像眉髮衣章巾履服飾無不周備傍有一人寬衣大袖持籬蕭香後一人童子雙髻高束謹若聽命皆非人力圖繪鑄刻所及元裕每有祈禱即紫炁上浮又有靈泉自湧士民請福無不立効遂刻石建宇用旌其瑞乃畫圖呈進乞編入史詔從之武宗會昌元年初以二月十五日大聖祖降誕之日為降聖節仍令兩京及天下諸州府設齋行道作樂賜大酺三日軍期急速亦不在此限永為常式懿宗咸通十年九月十日徐州逆寇龐勳領徒黨三千餘人來亳州太清宮其日宮北百姓三百餘人見老君自宮中乘雲而下須臾黑霧遍南川中群賊迷路自相殺戮龐勳溺水而

死群光自此殄滅汴州節度使太清宮使李蔚具事上聞詔曰我國家系承混元教遵清淨苦縣舊里聖相故鄉官宇具嚴廟貌斯設昨者餘妖奔突縱火將欲焚燒陰霧覆閉於晴空狂寇顛迷於道路散逸原野遂至誅夷

緬惟玄功申茲靈贖內出青詞又委李蔚虔申告謝布示中外仍付史官十三年三月台州刺史姚鵠奏於天台山修老君殿於其地穿獲得石函冊文以進乞付史館頒示四方詔從之廣明二年三月河中節度使王重榮奏據晉州中龍角山慶唐觀老君殿側柏樹上瑞葛枯死重生先是武德中混元應現後於二樹間立殿宇逾年之後柏樹上忽自生葛蔓長十餘丈榮茂於常其後齊王奪嫡此葛枯死旬月之後自其末青翠再生齊王遂敗至中宗復位安史叛逆朱泚謀亂皆忽枯落久而復生廣明元年黃巢犯關其年秋葛蔓枯死二年春枝葉重茂又於傍樹上別生一技旬日之中長五十餘尺相對繁茂有異於常奏詔褒美編付史官其後祥異皆有詔

勅蓋美乎葛蓋慶其孫謀必從昭其遠作混元流既奕葉無窮者也皇帝駐蹕西蜀中和二年八月九日進到帝令宣示內外三年三月十一日亳州刺史潘稠差道士馬含章孫棲梧等奏太清宮自乾寧四年已後累有逆寇侵犯真源少或逾千多或至萬皆窺伺是宮欲為焚劫或來攻城邑或旁犯縣城老君皆密垂神化忽起濃雲或驅以陰風或擊以雷電率皆顛沛尋至敗亡靈既益彰神功罔測尋詔昇真源縣為靈縣仍內出青詞脩崇告謝帝即稽首東拜八月十二日勅亳州太清宮是混元降聖之里名高道祖福履皇基九宮之瑞并涵空一鹿之仙蹤在樹累代之禎祥可紀近年之感應尤彰所宜嚴盛於福庭安可荒涼於靜宇潘稠能施善政久染真風廣出俸錢備修宮觀垣墉棟桶無不精新像設丹青彌加煥麗觀圖考事深可慰嘉其住宮威儀道士吳重玄可賜紫仍號凝玄先生道士馬含章孫棲梧並賜紫潘稠加金紫光祿大夫檢校工部尚書餘並如故其年八

月二十九日夜詔帝房宗室李持立與道士李元為於成都府青羊肆玄中觀混元降生舊地設醮祈真忽見虹光如彈丸許漸漸明大出於殿基東南竹林中跳躑入西南梅樹下沒於沒處穿地三尺已來得寶塢一口長一尺一寸五分闊七寸四分一邊厚一寸三分並有花文一邊厚一寸八分重一十二斤有古篆六字各方二寸深三分鐫刻瑩潔迨非人工文曰太上平中和災九月一日西川節度使侍中陳敬瑄奏曰皇帝陛下稽古順天膺圖撫運凝懷至道屬想大同是用省方以明罪已深仁旁達於下土至德昇聞於上玄符讖允臻祲祥間出降太上匡持之命清中和寇孽之災迺示明文爰形古篆足表妖氛即珍瓊祚充疆克知收復之期便是清寧之日至十二日帝令宣示百官中書侍郎平章事韋昭慶戶部侍郎平章事蕭遘門下侍郎平章事鄭畋御史中丞張漬宗正卿嗣曹王龜年表賀曰伏以菴滿燭聚車駕省方天災流行國家代有陛下降成湯罪已之詔徵

王者有征之師顧彼兇妖即當殄滅清平既彰於嘉兆幽贊爰觀其秘文赤雀銜書顯豈同於太上玄龜負卦慶難比於平吳況因宗室齋醮之辰仍有祥光跳躑之瑞其為感現可謂丁寧樞密使李順融十渾十二衛都指揮使四令孜表賀曰今者又有維城來於仙觀至誠纒發嘉兆俄呈現此時在地之赤光是昔日度關之紫氣及穿積土果獲古文驗逸勢於龍蛇即知平於梟獍於冲運理頌基昭開既太上今與平災知中和未昌厥祚所現全因聖祖掘得又自皇枝捧此靈蹤可明天意且混元聖祖每逢多難皆有殊祥唯彼明徵備書正史昔於丹鳳門上告田同秀與天寶復國之期今又青羊肆中示李特立以陛下還宮之慶莫不天下幸甚乞付史館帝並俞之十五日李特立授太子校書李元為賜紫仍各賜緡帛三百匹二十一日又詔曰太上玄元大帝與弟子文始先生講真經於樓觀之臺約後會於青羊之肆便乘雲駕俱入流沙仙記傳聞地圖標載自周昭至于此

日曆數約二千餘年景象寂寥基業隳落今因聖靈顯昭彰殊光跳躍於庭前靈臺申明於樹下博舍古色字驗休禎中和之災害欲平厚地之禎符乃現足乘玄宵降祐聖祖垂祥將殲大盜之兵戈未耀中興之事業須俾簡冊兼示寒區已付史官備令編錄仍模勒文字告示諸道及軍前其觀可改號為青羊宮仍置殿堂屋宇側近屬觀田地約有兩頃近來散屬黎氓多植葱蒜清虛之地難使薰蒸已賜錢二百貫便令收贖仍給公驗未歸靖慮宗子特立已除官道士李元為已賜紫所宜并獎用荷慶靈敬瑄位冠公台風行郡國効節於延洪之代修心於道德之鄉遠今境內消兵地中呈寶其為林美倍可嘉緝至十月七日勅高品郭遵泰監建青羊宮土木之工並用內庫宣賜自獲靈瑞之後至是月癸丑近蜀郡寇相次擒戮旬月之內遂致清平駕幸青羊宮頒賜有差李特立賜緋投龍州錄事參軍又下詔曰太上垂祥青羊應現禮宜崇飾用答殊休諸道州府紫極宮宜

委長史如法修飾仍還有科儀道士祭醮是月乙卯奏收復京城有以見大道垂休聖祖昭祐洪圖延永唐祚無疆者也又勅翰林學士承旨尚書兵部侍郎知制誥樂朋龜撰碑立之伏乞頒示天下以表皇家承神仙之苗裔感太上之靈貺實萬代之無窮也且今檢會從國初已來所造官觀約一千九百餘所度道士計一萬五千餘人其親王貴主及公卿士庶或捨宅捨莊為觀並不在其數則帝王之盛業自古至于我朝莫得而述也中和四年十二月十五日上都太清宮文章應制弘教大師賜紫道士臣杜光庭上進謹記

### 歷代崇道記

### 體玄真人顯異錄

木神作祟

惟二

萊陽東南白坡莊有王進之妻董氏患急弓風屢召名醫治之弗效經其半載忽聞有三先生號體玄真人到白坡蒼進乘馬引僕請師不允進還與親復謔曰若王先生不來救之則董氏之命在於朝夕矣其父子二人再同步詣卷彌加懇請師乃許遂至坡居視患人曰我將謂何病指摩木佛前神子云誰知此箇火頭作祟令進等燒却良久董氏訝而笑曰妾病若遺也一家欣然拜謝師欲出眾為之曳衣勉留齋畢乃去

瓦獸為災

孫富福山縣南塔子莊人也家資稍盛醜醜理生性賦強梁語多侮狎不居禮節里人謂之瘋三郎也常從師遊巖山林以鳥歌酒之友嘗一日忽患血痢淹延月餘藥食無功疼痛弗忍切切然自訟曰先生胡不來救我邪語未已師從門外呼之曰家中有孫癡三否子欽出而迎曰大人病將枯矣師曰不妨欽